

C.1 英雄的出身與描述 - - 2.談見識、論英雄

(一) 1. 《三國演義》第十六回：

卻說玄德前奔許都，到城外下寨，先使孫乾來見曹操，言被呂布追逼，特來相投。
操曰：「玄德與吾，兄弟也。」便請入城相見。……

荀彧入見，曰：「劉備，英雄也。今不早圖，後必為患。」操不答。

彧出，郭嘉入，操曰：「荀彧勸我殺玄德，當如何？」

嘉曰：「不可！主公興義兵，為百姓除暴，惟仗信義以招俊傑，猶懼其不來也。今玄德素有英雄之名，以困窮而來投，若殺之，是害賢也。天下智謀之士，聞而自疑，將裹足不前，主公誰與定天下乎？夫除一人之患，以阻四海之望。安危之機，不可不察。」
操大喜，曰：「君言正合吾心。」

次日，即表薦劉備領豫州牧。

程昱諫曰：「劉備終不為人之下，不如早圖之！」

操曰：「方今正用英雄之時，不可殺一人而失天下之心。此郭奉孝與吾有同見也。」遂不聽昱言。

以兵三千、糧萬斛，送與玄德。使往豫州到任，進兵屯小沛，招集原散之兵，以攻呂布。

2. 《三國演義》第十九回：

(呂布為曹操所擒)布告玄德曰：「公為坐上客，布為階下囚，何不發一言而相寬乎？」玄德點頭。

及操上樓來，布叫曰：「明公所患，不過於布。布今已服矣！公為大將，布副之，天下不難定也。」

操回顧玄德曰：「何如？」

玄德答曰：「公不見丁建陽、董卓之事乎？」

布目視玄德曰：「是兒最無信者！」

操令牽下樓，縊之。

3. 《三國演義》第廿一回：

(曹操與劉備於園中飲酒)酒至半酣，忽陰雲漠漠，驟雨將至。從人遙指天外龍挂(龍捲風)，操與玄德憑欄觀之。

操曰：「使君知龍之變化否？」

玄德曰：「未知其詳。」

操曰：「龍，能大能小，能升能隱，大則興雲吐霧，小則隱介藏形，升則飛騰於宇宙之間，隱則潛伏於波濤之內。方今春深，龍乘時變化，猶人得志而縱橫四海。龍之為物，可比世之英雄。玄德久歷四方，必知當世英雄，請試指言之。」

玄德曰：「備肉眼，安識英雄？」

操曰：「休得過謙！」

玄德曰：「備叨恩庇，得仕於朝。天下英雄，實有未知！」

操曰：「既不識其面，亦聞其名。」

玄德曰：「淮南袁術，兵糧足備，可謂英雄？」

操笑曰：「塚中枯骨，吾早晚必擒之！」

玄德曰：「河北袁紹，四世三公，門多故吏。今虎踞冀州之地，部下能事者極多，可謂英雄？」

操笑曰：「袁紹色厲膽薄，好謀無斷，幹大事而惜身，見小利而忘命，非英雄也！」

玄德曰：「有一人，名稱八俊，威震九州，劉景升可謂英雄？」

操曰：「劉表虛名無實，非英雄也！」

玄德曰：「有一人，血氣方剛，江東領袖，孫伯符乃英雄也！」

操曰：「孫策藉父之名，非英雄也！」

玄德曰：「益州劉季玉，可謂英雄乎？」

操曰：「劉璋雖係宗室，乃守戶之犬耳，何足謂英雄？」

玄德曰：「如張繡、張魯、韓遂等輩，皆如何？」

操鼓掌大笑，曰：「此等碌碌小人，何足挂齒！」

玄德曰：「舍此之外，備實不知。」

操曰：「夫英雄者，胸懷大志，腹有良謀，有包藏宇宙之機，吞吐天地之志者也。」

玄德曰：「誰能當之？」

操以手指玄德，復自指，曰：「今天下英雄，惟使君與操耳！」

玄德聞言，吃了一驚，手中所執匙箸，不覺落於地下。

時正值大雨將至，雷聲大作。玄德乃從容俯首拾箸，曰：「一威之震，乃至於此！」

操笑曰：「丈夫亦畏雷乎？」

玄德曰：「聖人言『迅雷風烈，必變！』，安得不畏？」
將聞言失箸緣故，輕輕掩飾過了。操遂不疑玄德。……。

須臾，席散，玄德辭操而歸。

雲長曰：「險些驚煞我兩個！」

玄德以落箸事說與關、張。關、張問是何意？

玄德曰：「吾之學圃，正欲使操知我無大志。不意操竟指我為英雄，我故失驚落箸。

又恐操生疑，故藉雷以掩飾之耳！」

關、張曰：「兄真高見！」

(二) 1. 《三國演義》第廿二回：

(曹操)遂聚眾謀士，商議迎敵。

孔融聞之，來見操曰：「袁紹勢大，不可與戰，只可與和。」

荀彧曰：「袁紹無用之人，何必議和？」

融曰：「袁紹土廣民強。其部下如許攸、郭圖、審配、逢紀，皆智謀之士；田豐、沮授，皆忠臣也；顏良、文醜，勇冠三軍；其餘高覽、張郃、淳于瓊等，俱世之名將。何謂紹為無用之人乎？」

彧笑曰：「紹兵多而不整。田豐剛而犯上，許攸貪而不智，審配專而無謀，逢紀果而無用。此數人者，勢不相容，必生內變。顏良、文醜，匹夫之勇，一戰可擒。其餘碌碌等輩，縱有百萬，何足道哉！」

孔融默然。

操大笑曰：「皆不出荀文若之料。」

(三) 1. 《三國演義》第廿四回：

程昱曰：「……劉備現在徐州，分布犄角之勢，亦不可輕敵。況今袁紹屯兵官渡，常有圖許都之心。若我一旦東征，劉備勢必求救於紹。紹乘虛來襲，何以當之？」

操曰：「非也。備乃人傑也，今若不擊，待其羽翼既成，急難圖矣。袁紹雖強，事多懷疑不決，何足憂乎！」

正議間，郭嘉自外而入。

操問曰：「吾欲東征劉備，奈有袁紹之憂，如何？」

嘉曰：「紹性遲而多疑，其謀士各相妒忌，不足憂也。劉備新整軍兵，眾心未服，丞相引兵東征，一戰可定矣。」

操大喜曰：「正合吾意。」

遂起二十萬大軍，分兵五路下徐州。

2. 《三國演義》第廿五回：

卻說程昱獻計曰：「雲長有萬人之敵，非智謀不能取之。今可即差劉備手下投降之兵，入下邳，負見關公，只說是逃回的，伏於城中為內應。卻引關公出戰，詐敗佯輸，誘入他處，以精兵截其歸路，然後說之可也。」操聽其謀，……。

公戰至日晚，無路可歸，只得到一座土山，引兵屯於山頭，權且少歇。

曹兵團團將土山圍住。……

（曹操派張遼勸降關羽，……）公曰：「吾仗忠義而死，安得為天下笑？」

（張）遼曰：「兄今即死，其罪有三！」

公曰：「汝且說我哪三罪？」

遼曰：「當初，劉使君與兄結義之時，誓同生死。今使君方敗，而兄即戰死，倘使君復出，欲求兄相助，而不可復得，豈不負當年之盟誓乎？其罪一也。

劉使君以家眷付託於兄，兄今戰死，二夫人無所依賴，負卻使君依託之重，其罪二也。

兄武藝超群，兼通經史，不思共使君匡扶漢室，徒欲赴湯蹈火，以成匹夫之勇，安得為義？其罪三也。兄有此三罪，弟不得不告！」

公沉吟曰：「汝說我有三罪，欲我如何？」

遼曰：「今四面皆曹公之兵，兄若不降，則必死。徒死無益，不若且降曹公，卻打聽劉使君音信，如知何處，即往投之。一者可以保二夫人；二者不背桃園之約；三者可留有用之身。有此三便，兄宜詳之！」

公曰：「兄言三便，吾有三約。若丞相能從，我即當卸甲；如其不允，吾寧受三罪而死。」

遼曰：「丞相寬宏大量，何所不容。願聞三事。」

公曰：「一者，吾與皇叔設誓，共扶漢室，吾今只降漢帝，不降曹操。

二者，二嫂處請給皇叔俸祿養贍，一應上下人等，皆不許到門。

三者，但知劉皇叔去向，不管千里萬里，便當辭去。

三者缺一，斷不肯降。望文遠急急回報。」……。

操曰：「文遠之言甚當，吾願從此三事。」

張遼再往山上，回報關公。

關公曰：「雖然如此，暫請丞相退軍，容我入城見二嫂，告知其事，然後投降。」……

關公辭退，遂引數十騎來見曹操。

操自出轅門相接。關公下馬入拜，操慌忙答禮。

關公曰：「敗兵之將，深荷不殺之恩！」

操曰：「素慕雲長忠義，今日幸得相見，足慰平生之望。」

關公曰：「文遠代稟三事，蒙丞相應允，諒不食言？」

操曰：「吾言既出，安敢失信！」

關公曰：「關某若知皇叔所在，雖蹈水火，必往從之。此時恐不及拜辭，伏乞見諒。」

操曰：「玄德若在，必從公去，但恐亂軍中亡矣。公且寬心，尚容緝聽。」

關公拜謝。

3. 《三國演義》第三十回：

曹操探知袁紹兵動，便分大隊軍馬，八路齊出，直衝紹營。

袁軍俱無鬥志，四散奔走，遂大潰。……紹急渡河，盡棄圖書、車仗、金帛，止引隨行八百餘騎而去。

操軍追之不及，盡獲遺下之物。所殺八萬餘人，血流盈溝，溺死者不計其數。

操獲全勝，將所得金寶緞匹，給賞軍士。

於圖書中檢出書信一束，皆許都及軍中諸人與紹暗通之書。

左右曰：「可逐一點對姓名，收而殺之。」

操曰：「當紹之強，孤亦不能自保，況他人乎？」

遂命盡焚之，更不再問。